

Fu posto per li ditti, che a quelli di la villa di Salvaterra sotto la Badia, per el sizon ave sto Luio, siano fati exenti dil bochadego per anni 5. 185, 0, 3.

Fu posto, per li Savii, elezer il primo Pregadi per scurtinio do oratori a la Cesarea et Catholica Maestà con ducati 120 per uno, menino cavali et do stafieri, trà li qual il secretario con il suo fameglio, et diti danari sia per spexe, et sia tenuto quando et come parerà a questo Cousejo parlar e con la commissione li sarà data; di qual do, rimasti i saranno et accettadi, sia balotà chi habbi a restar in loco di sier Gasparo Contarini, et l'altro debbi venir poi a repatriar, *ut in parte*. Fu presa.

Fu posto per li diti elezer uno orator al serenissimo Infante archiduca di Austria, con ducati 120 al mexe, *ut supra*.

Fu posto per li diti, elezer uno orator a lo illustrissimo duca di Milan con ducati 100 al mexe con cavali 10, et do stafieri, et il secretario, *ut supra*.

Fu posto per tutti i Savii di Collegio, dar licentia a sier Lorenzo Orio dottor e cavalier orator nostro in Hongaria; ma che si mandi uno Secretario di qui a star apresso quel Re con ducati 40 al mexe per spexe et cavali 10, da esser balotado in Collegio, qual zonto sii in Hongaria, esso orator vengi a repatriar.

Fu posto per li ditti, dar licentia *etiam* al Secretario d'Ingallera vengi via, che fu preso el restasse, et che 'l Consolo nostro de li debbi negociar con il serenissimo Re et reverendissimo Cardinal, di tempo in tempo quello achaderà. Fu presa.

Fu posto una lettera al Provedador di l'armada, che mandi a disarmar 3 galle vechie armade di qui, et la galla Eriza, *etiam* altre galle restando fuora esso Provedador solamente, computà il capitano dil Golfo, con 10 galle; et fu preso, *videlicet* mandi la galla del Brunà brexana e tre galle dalmatine. 165, 15, 2.

197 • Fu posto per il Collegio, che a sier Justo Guoro stato provedador ad Ampho, qual ha speso ducati 51 dil suo per quel castello, sia pagà a la camera di Bergamo. 140, 22, 9.

Fu posto per il Collegio, che a uno Vivian fornaruol (*si dia*) certa provision a Bergamo a Zuane so fiol di ducati 3 per paga, a page 8 a l'anno, a Bergamo. 137, 11, 8.

Fu posto per 4 Consieri, absenti sier Francesco Foscarei e sier Lucha Trun, et sier Piero Morexini et sier Beneto Barbarigo auditori novi sono in sinichà, quali vien a compir il suo officio, et non li essendo

perlongà il tempo veriano a restar solo do syndici fuora, pertanto sia preso che li diti syndici debano continuar il sinichà, e il tempo sia perlongato a sier Piero et sier Beneto, come ad altri è stà facto, fino al compir del suo sindichato. Fu presa. Ave: 129, 13, 3. Et fu contra le leze.

Fu posto per i Savii, che a sier Maffio Michiel va retor a la Cania li sia dà una galla per il Provedador di l'armada, che lo condugi de li con la soa fameia, *ut in parte*. 165, 13, 1.

Fu posto per tutti di Collegio, che Zuan Batista da Castro citadin di Cao d'Istria e Pyran, qual era nel numero di cavali lizieri, fo caso, pertanto sia ritornà a servir la Signoria con la provision l'havea da esser pagato a la camera di Raspo, a pagè 8 a l'anno, e tegni do cavali. 151, 9, 1.

A dì 21 Venere. Da matina veie il signor Thodaro Triulzi, qual è alozato a San Polo sul campo in càxa dil Faità, in Collegio, molto menichonico et magro, con assa' soldati, maxime fanti driedo, acompagnato da quatro zentilhomeni solamente, che la Signoria mandò a levarlo sier Andrea Mozenigo el dottor, sier Marco Antonio Venier el dottor, sier Thomà Michiel è di Prègadi, et sier Antonio Dandolo è di Prègadi vestiti di scarlato. El qual zonto in Collegio, si abrazò col Serenissimo aleggrandosi di la soa creazion, sicome primà per sue letterè havea fatto, poi sentato apresso Sua Serenità, disse assa' parole di la servità haveva a questo Stado et fede, et ancore che fusse fata questa liga et paxe con la Cesarea Maestà, ch'è indirecte contra il re Christianissimo di la qual parte è la càxa Triulza foraussita di Milan, et havia perso tutte le loro intrade, pur volendo la Signoria, serviria anchora per Governador il Stado.

È da saper. Eri in Rialto fu fato una crida per Nicolò de Ricardo comandador, di questo tenor. Di ordine dil Collegio, el Serenissimo Principe fa a saper a tutti quelli che sono debiti si a l'officio de le Raxon nuove come a li altri officii, che scuodeno danari di daci, che debbano andar a pagar quanto sono debitori, altramente se manderà ad execution contra di loro le parte et ordeni presi circha tal debiti, *videlicet* che serano astreti real et personalmente.

È da saper. Eri matina in do Quarantie Criminal et Civil vechio, per numero 62, fu *tandem* expedito la cosa di 3 Signori stati sora i officii, si diano pagar la Signoria di quello hanno tochà a l'officio di pene che non doveano tuor, come è stà cognossuto per li scrivani di l'officio condanati in